

Haeuxnaengj Haj Saek Mbanjcuengh

上林县大丰镇中心学校六年级 Veiz Gyah/韦嘉

Ndwensam, daihdeih heusausau, gofaex did ok ngazoiq youh heu youh mwn. Gvangjsih Bouxcuengh Swcigih couxdaeuj aenciet angqyangz — sam nyied sam.

Sam nyied sam dwg ngoenzciet conzdungj Bouxcuengh, ngoenzde Mbanjcuengh ranzranz cungj guh haeuxnaengj haj saek. Gij saek haeuxnaengj ronghsien ndeiawj de, miz hau、henj、hoengz、gyaemq、ndaem haj saek. Gij saek haeuxnaengj dwg aeu mbaw caeuq va doenghgo daeuj nyumx baenz, miz mbawraeu、go、gyaemq、vamai daengj. Haeuxnaengj haj saek guhfap gig genjdanh, baez hag couh rox. Mbawraeu dwg yienghneix guh, dawz mbawraeu swiq seuq, daem mienz le ciemq raemx song sam ngoenz, caiq dawz gij raemx de daeuj cimq haeuxcid gvaq hwnz, ngoenz daihngleih lauz haeuxcid hwnj, ndik raemx hawq le caiq cuengq roengz ndaw caengq bae naengj, naengj ndei le, haeuxnaengj couh bienq ndaemndwtndwt. Go-gyaemq miz saeknding saekgyaemq song cungj,



go'gyaemq caeuq vamai ityiengh, swiq seuq le dawz daeuj cawj raemx, gij saek de cawj okdaej le, daih aeu gij raemx de daeuj cimq haeuxcid gvaq hwnz, ngoenz daihngleih lauz hwnj ndik raemx le caiq naengj. Yienghneix haeuxnaengj haj saek couh guh

baenz lo.

Haeuxnaengj haj saek mbouj dan ndeiawj, lij gig hom gig ndeigwn. Mwh lij youq ndaw caengq naengj, gij heiqhom couh hawj vunz myaiz doekyagyag. Cawj cug le hai aen facaengq, cij raen gij haeuxnaengj wenjriongh unqnemnem, homfwdfwd, hawj mwngz gwn gaemz youh siengj gaemz, dingz mbouj roengzdaej. Gwn gvaq haeuxnaengj Bouxcuengh, imq youq ndaw dungx, hom youq ndaw sim, sawj mwngz roxnyinh gwndaenj couh lumj haeuxnaengj haj saek ityiengh gyaundeide dangq-maz!

Ciet sam nyied sam Bouxcuengh raeuz cawz le guh haeuxnaengj, lij guhcaemz ciengj bauqva、dwkdom、eufwen、dwklongj…… nauhyied lai lo!

Sam nyied sam dwg aen ciet cei nauhyied Bouxcuengh Guengjsae, angqcoux mwngz sam nyied sam daengz ranzmbanj Bouxcuengh daeuj guhhek!

(boux lauxsae son'gyauq Vangz Gveiyangh)

Aencung Dwgggyaez Gou

贵港市覃塘区蒙公镇英峨小学五年级 Luz Swghinz/陆思勤

Gou miz aen cung dwgggyaez ndeu, dwg gou gvaq cib bi ngoenzseng seiz daxmeh soengq hawj gou. Gij yienghceij de dwg boux dahsau iq gwnz gyauej miz duz mbungqmbaj ndeu, dwgggyaez lai lo. Moix ngoenz gou dingh ndei seizgan, naenx duzmbungqmbaj mbat ndeu, baez daengz seizgan, de couh singgok heuh dwk: "Siuj baengzyoux, vaiq hwnqmbonq, vaiq hwnqmbonq." Baez dingq singhemq, gou sikhaek ndiu gvaqdaej, yienghneix, hwnjhag、guhsach, gou cungj mbouj gvaiz gvaq.

Gou gyaez aen cung neix, aenvih de moix ngoenz cungj nyinhcaen guhhong, mbouj gik gvaq.

Yawj, youq gwnz cung, cimdiemjung、cimfaencung、cimiuxcung mbouj dingz dwk byaij baenaj, couh lumj sam beixnuengx nei. Lauxsam cimmiuxcung beizheiq miz di gip, buet ndaej cei vaiq, de buet le gien ndeu, lauxngeih cimfaencung cij nod ndaej gek iq ndeu; caj lauxngeih sinsin hojhoj buet le gien ndeu, daeggo cimdiemjung cij byaij ndaej gek hung ndeu. Hoeng gyoengqde gaenjmaed boiqhab, coengzlaiz mbouj baij goenglauz swhgeij, vihliux gunghcoz, vihliux bouxcawj, gyoengqde doxgiet doxndei.

Aencung buenx gou gvaq le haujlai nanz, geiq ndaej miz baez he, aenvih ngoenz daihngleih gou yaek bae hagdangz baet gyausiz, gou yaek hwnq caeux di, hoeng, gou ninz gvaq seizgan lo, mwh aencung yiengj baez daihsam gou cij ndiu, gou sikhaek hwnqmbonq, vaiqvet daenj buhvaq cat heuj swiq naj, buet bae hagdangz, caeklaiq miz aen cung dwgggyaez neix, ngoenzhaenx gou cij mbouj daengz gvaiz, gou engq gyaez aen cung dwgggyaez neix lo.

Aen cung dwgggyaez neix, hawj gou rox ndaej aen dauhleix "conq seizgan conq gim, conq gim nanz cwz conq seizgan" neix. Daj seizneix hwnj, gou engqgya insik seizgan, dawz saehcingz guh ndaej engq ndei.

(lauxsae son'gyauq Couh Veijcangj)



Mbwnnit



Rumzbaek nitsisi cioo baenz-ngoenz baenzhwnz bae, sing yak nyi lai, hawj vunz nyi le simgyap lai, raq rumzbaek dwgcaengz neix ok gizlawz daeuj ne?

Boh naeuz, rumzbaek ok baih-baek gya'e'gyanggyang de daeuj, rumzbaek ak lai manz lai, ciengzseiz hawj fawnit baihbaek caembyam-byam bae, mongmumu bae.

Rumzbaek mbouj gyaez mbaw-faex heuswdsd nauq,

Rumzbaek mbouj gyaez dujva gyaundeide nauq,

Rumzbaek mbouj gyaez garij yiengj dinghdungh nauq,

Rumzbaek mbouj gyaez duzroeg angqvauvau mbinfiufiu guhfwen nauq.

De ginggvaq ndoengfaex, couh sik mbawfaex heuswdsd bae liux,

De ginggvaq gadah garij, couh aeu nae goemq haeuj gij singyiengj dinghdungh bae,

De mbouj hawj gyangdoengh miz va hailangh nauq,

Nit daengz duzroeg ndoj youq ndaw rongz, roxnaeuz laeh gyoengqde bae diegggae youq……

Rumzbaek ak baenzneix manz baenzneix, guhlawz baez daengz gizneix, baez daengz Byalau Cibfanh raeuz gizneix, couh baenz-ngoenz baenzhwnz hemqoo lumj daejnga'nga nei? Guhlawz lumj duz mayak deng vunz aeu faexgyaengh moeb, youh lau, youh haemz, youh yup, youh sim mbouj nyied, geb diuz rieng gongzoo?

Rumzbaek goj sim mbouj nyied dwg lwi? Hozndat lai dwg lwi? Lau lai dwg lwi? Mwngz yawj, youq gizneix, youq Byalau Cibfanh gizneix——

Bouxboux cungj mbouj lau rumzbaek ak lai,

Bouxboux cungj mbouj lau rumzbaek manz lai,

Bouxboux cungj mbouj leix-langh rumzbaek angq mbouj angq,

Gofaex cungj ciuqyiengh nauhnauh yiedyied iet mbawfaex heuswdsd de,

Dujva cungj ciuqyiengh angq-fwngfwng hailangh rim gwnz bo gwnz bya,

Duzroeg cungj ciuqyiengh angqvauvau mbinfiufiu guhfwen,

Garij gadah cungj ciuqyiengh yiengjdinghdungh, lae bae giz-gyae……

Byalau Cibfanh maenh'ak raeuz, doenghgi rumzbaek ak lai manz lai de, youq gizneix goj mbouj gamj angj ak!

Byalau Cibfanh gyaundeide dwgggyaez raeuz, bi daengz rieng, angqfaengz nauhyied, ronghrangh youh saek lai gyaundeide.

(Daj《Bonjsei Sim Lwngnyez》(Veiz Gizlinz raiz) senj okdaej, Lwgfwnzgmeh/卢奋长 hoiz)